

## Retningslinjer

### Tilskot til prosjekt og tiltak - profesjonell kunst og kultur

*Revidert versjon vedtatt i hovudutval for Kultur, idrett og integrering 13.januar 2021*

Vestland fylkeskommune lyser ut midlar til tilskotsordningar til prosjekt og tiltak av regional verdi og med eit kunst- og kulturføremål. Midlane vert fordelte mellom ei ordning for profesjonell kunst og ei ordning for frivillig kulturliv etter søknadsmengde og søknadssum.

Kultursatsingane i Vestland fylkeskommune er vedteke gjennom regional plan for kultur i Hordaland 2015-2025, PREMISS:KULTUR og i regional plan for kultur i Sogn og Fjordane 2019-2027, Kultur for alle . Desse planane vil gjelde i det geografiske området dei er vedteke i fram til regional plan for kultur i Vestland er vedteke.

#### **Om regional verdi:**

Omgrepet regional viser her til to prinsipielle hovudkriterium:

- Geografisk kriterium (geografisk nedslagsfelt og verkeområde): Om tiltaket omfattar fleire kommunar og / eller om tiltaket vert gjennomført eller har deltaking frå meir enn to kommunar.

- Funksjonskriterium (regional funksjon i kraft av oppdrag, storleik, fagleg tyngd, kvalitet og særpreg).

Alle tilrådde tiltak og prosjekt skal ha regional verdi – geografisk og / eller funksjon.

Storleik og omfang treng ikkje vere avgjerande. Fagleg kvalitet og særleg grad av nyttenking m.m. kan også ligge til grunn for at eit tiltak har regional verdi.

I tråd med kulturlova er det kommunane som skal leggje til rette for og sikre eit breitt lokalt kulturtilbod. Fylkeskommunen si rolle er å vere ein regional utviklar, og ha oversyn og sikre tilgjenge til meir spesialiserte eller regionale kulturtilbod. Dette ligg i botn for vurderingane også i denne tilskotsordninga.

#### **Føremål med ordninga**

Ordninga skal stimulere til at Vestland fylke har eit sterkt og levande profesjonelt kunst- og kulturliv. Ordninga skal også sikre innbyggjarane i heile fylket tilgang til eit mangfaldig kulturtilbod av høg kvalitet.

Ordninga skal styrkje gjennomføringa av eit regionalt kunstløft slik det er skissert i dei regionale planane for kultur, og skal svare på aktuelle utfordringar og behov innanfor eit ambisiøst og profesjonelt kunst- og kulturliv i fylket. Ordninga skal omfatte kunst- og kulturprosjekt i regi av profesjonelle aktørar i Vestland eller tiltak og prosjekt som er retta mot/går føre seg i fylket.

Barn og ungdom har spesiell merksemd, og vi ønskjer å stimulere til at unge er aktive deltakarar i prosjektet.

#### **Kven kan søke?**

Ordninga gjeld for aktørar og/eller aktivitetar innan det profesjonelle kunst- og kulturfeltet i Vestland fylke, og prosjektet eller tiltaket skal ha eit kunstnarleg / kulturfagleg hovudføremål.

Søkjjar må ha organisasjonsnummer.

Organisasjonar / institusjonar som tek imot driftsstøtte frå VLFK kan søkje støtte til prosjekt eller tiltak som fell utanfor den ordinære drifta, som t.d. samarbeidsprosjekt og utprøving av nye tiltak.

## **Søknadsfrist**

Tilskotsordninga skal ha to årlege søknadsfristar.

## **Kva kan ein få støtte til**

Det regionale ansvaret gjeld kulturoppgåver og kunst som har verdi for heile eller større delar av fylket. Fylkeskommunen har eit særleg ansvar for regional infrastruktur og utvikling av dette. Prosjekt og tiltak må bli vurder til å ha regional verdi og/eller nedslagsfelt for å få støtte.

Tilskotsmidlane kan gje høve til å prøve ut nye prosjekt og tiltak som kan vere med på å vidareutvikle kulturlivet i fylket, t.d gjennom pilotprosjekt med overføringsverdi til andre.

Tiltaket det blir søkt om må oppfylle alle dei tre absolutte kriteria for å kunne verte tilrådd støtte:

1. Tiltaket skal vere i samsvar med føremålet i søknadsordninga.
2. Tiltaket skal støtte ein eller fleire satsingar i regional plan for kultur.
3. Tiltaket skal ha regional kulturverdi.

Løyvinga skal i hovudsak ligge mellom 10 000 og 100 000 kroner.

Det blir ikkje gitt støtte til følgjande:

- Innkjøp og vedlikehald av bygg, utstyr og instrument.
- Tiltak/prosjekt i regi av fylkeskommunale eller kommunale institusjonar
- Produksjonsfasen av kunst, det vere seg innan visuell kunst, musikk, scenekunst eller skjønnlitteratur.
- Deltaking på seminar, utdanning, studiereiser, gjestekunstnaropphald o.l.

## **Vurdering**

Søknaden blir vurdert ut i frå følgjande kriterium:

- a) Utvikling av kulturlivet i fylket
- b) Samarbeid og nettverk
- c) I kva grad tiltaket eller prosjektet er utadretta, inkluderande og ope
- d) Kvalitativt nivå på prosjekt og søknad.
- e) Tidlegare vist gjennomføringsevne av kulturtiltak / prosjekt
- f) Støtte og forankring kommunalt og evt. nasjonalt

Ein søknad må ikkje oppfylle alle vurderingskriteria, men jo sterkare og jo fleire av desse som vert oppfylt, dess meir relevant vil søknaden vere for ordninga.

Støtte gjennom desse støtteordningane er ikkje rettighetsbasert, og det er vanlegvis mange fleire kvalifiserte søkjarar enn der er tilgjengelege midlar.

Det vert i den samla vurderinga teke omsyn til å fordele ut frå geografi og sjanger. Fylkeskommunen har eit særleg ansvar for å bidra til mangfald og breidde i kulturlivet i heile fylket. Det er såleis særleg viktig å støtte opp under kunst og smalare kulturuttrykk også i distrikta.

Det er mogleg å søkje midlar til årvisse / faste tiltak. Søkjar må då vere merksam på at søknadene kvart år vert vurdert på nytt opp imot samla søkjarmasse.

## **Krav til søknaden**

Søknaden skal fremjast på elektronisk søknadsskjema (lenke til søknadsskjema).

For å få støtte må søknaden gjere tilstrekkeleg greie for:

- føremål for og innhaldet i prosjektet eller tiltaket

- korleis prosjektet/tiltaket skal ha ein regional funksjon/verdi
- informasjon om korleis arbeidet er planlagt gjennomført
- budsjett

Dersom det ikkje er rom for å løyve minst 1/3 av søknadssummen, vil søknaden få avslag.

Vestland fylkeskommune fullfinansierer normalt ikkje prosjekt. Det er forventa at søkjar budsjetterer med andre kjelder for finansiering.

### **Sakshandsaming og vedtak**

Forvaltningslova ligg til grunn for all søknadshandsaming i Vestland fylkeskommune. Alle søknader er i utgangspunktet offentleg tilgjengelege, jf. Forvaltningslova (Fvl.). Unnatak gjeld personopplysningar. Desse vert unnateke offentlegheita jf. Fvl. §13. I særlege tilfelle kan utsett offentlegheit vurderast etter Fvl.

Avdeling for Kultur, idrett og inkludering førebur søknadane for politisk handsaming og vedtak i Hovudutval for kultur, idrett og integrering. Kvar søknad er eit einskildvedtak og innstilling skal grunngjevast i saksframlegget. Vedtak som fråvik frå fylkesrådmannen si innstilling skal også grunngjevast. Søknadene skal i hovudsak vere handsama innan tre månader etter søknadsfrist.

### **Oppfølging og rapportering**

Tiltaket skal gjennomførast på den måten og i det tidsrom som går fram av søknaden. Eventuelle vesentlege endringar i prosjektet må meldast skriftleg til sakshandsamar for vurdering og godkjenning.

Tilsegnsmottakar skal rapportere og sende inn rekneskap innan tre månader etter at tiltaket er gjennomført, og seinast eitt år etter vedtak om tilskot. Midlane vert i hovudsak utbetalt etter at dette er godkjend.

Fylkeskommunen og fylket sin revisor skal ha høve til å setje i verk kontroll med at midlar vert forvalta som føreset. Fylkeskommunen og fylket sin revisor skal ha rett til dei dokument og opplysningar ein finn påkravd for sin kontroll. Misleghald i bruk av tilskotet kan føre til krav om attendebetaling av heile eller deler av tilskotet, eller eventuelt andre sanksjonar.

### **Klage**

Vedtaket kan klagast på etter Forvaltningslova §28, som omhandlar klagerett for part eller anna person med rettsleg klageinteresse ved einskildvedtak. Søkjar kan klage på vedtaket innan ein frist på tre - 3 - veker. Fristen vert rekna frå den dagen søkjar tok imot melding om vedtaket.

Den fylkeskommunale klagenemnda er klageinstans. Ei klage må innehalde opplysningar om kva vedtak det vert klaga over, årsaka til at det vert klaga og kva endringar ein meiner bør gjerast. Klagen vert sendt til Vestland fylkeskommune.